

四庫全書

集部

欽定四庫全書

東江家藏集卷二十九

中集二十五

明 顧清 撰

北游稿

墓表墓碑十一首

明故江西按察司副使致仕過公墓表

正德己巳秋八月二十有六日江西按察副使致仕平  
湖過公卒于松明年庚午十一月八日葬松城東蟠龍

塘之原浙江按察司副使定菴曹公已為之銘矣光祿少卿陸君獻臣以其子夢元來致公治命請表其墓道初公自江西還未久而清入京師故未嘗識公及清以內艱歸公不以先達自居辱首弔焉所以獎借而撫存之甚至私念公遇我厚而莫知其由乃今重聞公後命老成凋喪典刑日遠勒而傳之正我輩事矣而況公實有命乎於是敬諾無讓即光祿狀節而表之而復系以銘表曰公諱璘字大璞別號一齋以僑居松江又號為

半松其先大梁人系出夏有過氏後宋秘書丞一之治  
剡有善政陳古靈嘗贈以詩見於氏族志靖康中有為  
郡守者避地江南子孫散居無錫海鹽間公海鹽族也  
海鹽後析平置平湖縣故為平湖人曾祖煥祖迪皆樂  
善好施不顯于時迪始遷松江之橫泖考仍字志得為  
贅壻于華亭顧知縣孟寅公生於顧氏故遂為松江人  
松之有過姓自公始公少失怙恃年十九猶混迹廛市  
間一旦棄去從張舉人時望學又學于袁方伯舜舉二

公皆器許之不數年業以大就天順辛巳由平湖貢入太學成化乙酉領鄉薦丙戌擢進士授工部主事分司呂梁洪再任管濟寧牌兩考改刑部主事陞員外郎郎中累階承德郎奉直大夫復累贈其考為奉直大夫刑部員外郎妣為宜人壬寅奉詔賑饑山東還陞江西按察司副使丁未致仕歸松江公聞朗剛直志存當世而才足以濟之在呂梁濟寧雖小試而統紀嚴明豪強順軌已赫然望于一時其斷獄尤號明允許州民趙道龍

為儉人誣以妖言利其死以覬賞所連及數十家公銜  
命往鞠即日理出之雖權勢恐喝不為動豐城李民泰  
陷平民兄弟三人為刼盜繫獄十餘年公至得其情杖  
殺民泰而盡釋繫者江西人稱以為神明而山東行荒  
政民被實德所全活數萬人蓋尤其偉然者然以剛不  
能為形勢俯仰遇事可否言鑿鑿無少避以是數迂于  
人豐城事有不悅公者又適在吏部据拾無所得卒以  
老疾去公人皆為公惜而公恬然一不介于中也故身

退而人益高之晚年兩目俱病然神志益精明廣筵長  
坐酬對井井其議論出入經史竟日忘倦雖少壯有弗  
及者卒之日竟無疾蓋其養於中者厚矣公生宣德辛  
亥六月二十九日比卒享年七十九配俞氏封安人進  
封宜人子一即夢元例授金山衛中所副千戶女一適  
工部主事宋瑛子註孫男二曰升曰復女一嫁湖廣布  
政使李清子泰然蟠龍之墓公所卜也俞宜人先三年  
葬至是始合銘曰

過膺自有夏遙遙延延若斷而聯仙居之詩剡溪是賢  
其後南遷而公興海壖入東刑書出參使旃若晨星麗  
躔垂五十年而來者濶焉尚復其先用弗宣其在公  
之傳

永嘉張氏世墓表

良菴張先生既葬其考遺菴君妣朱氏於祖怡閒翁祖  
妣吳孺人墓次又兆于其西以葬其配二孺人莊孺人  
左金孺人右而自為壽藏于其中既成乃追叙先德及



所以營作之意屬予書將刻石以示其來裔張氏其先  
永嘉人先生曾祖諱斌元末避亂攜其室陳氏渡浙江  
居華亭之南橋鎮至怡閒始遷縣南清河橋側而斌及  
陳氏葬南橋及吳孺人卒遺巷以南橋墓迫隘請于怡  
閒買地秀野橋之北原作新兆窆焉怡閒後十年乃合  
此東墓所由作也遺巷老先生已登朝墳塋宜備品式  
將預圖塋地遺巷聞而止之曰吾葬吾親而遠吾祖  
至今以為憾汝葬吾而遠吾父母是重吾憾也將卒又

亟以為言先生弗敢違及葬莊孺人追感遺命附垣為域不復敢他議金孺人卒先生已致仕乃拓地益北備今制焉此西墓所為作也先生先世多顯人遭亂播遷無可考斌僑寓客土掃地植業家以復興其才有足稱矣怡閒隱德弗耀積累日深而遺菴行誼尤篤事怡閒先事承志備盡愉悅吳孺人疾旦夕籲天祈代蓋蔬食者三年而吳疾卒瘳女兄壻陳敬贅于家落魄不檢或勸使出之公蹙然曰審爾吾姊將誰依卒與之共爨終

其身且畢其喪葬而撫其孤英英卒又撫其孤濟至成  
立而後已鄉人有告匱者隨疎戚緩急振貸之無所失  
歲旱得水艱作二井於通衢以便汲者至今為利其及  
物又如此吳孺人性明敏嫻於婦職如孝經女誡諸書  
皆能通其義朱孺人勤儉孝敬佐遺菴起其家莊氏金  
氏皆宦族女莊事先生起布衣先生稱其閒雅沈靜不  
以貧富易操劇易異心其賢可見金繼莊後亦以賢淑  
聞張氏之日以昌大亦其內有為之助也怡閒諱昕字

仲明壽最高卒時年八十九吳孺人亦七十三遺菴諱  
瑄字文瑄卒成化乙巳十一月初九日年六十九其生  
永樂丁酉五月二十日朱孺人後三年庚子七月二十  
八日生年七十八以弘治丁巳三月三日卒莊孺人生  
正統丁卯七月初三日卒弘治辛亥四月十一日年四  
十六金孺人生成化丁亥十月十九日卒弘治癸亥正  
月十四日年三十七先生既貴贈遺菴為文林郎江西  
道監察御史封朱氏為太孺人贈莊氏封金氏皆孺人

先生名縉字廷肅別號艮菴同產第一曰紳早世女兄  
第三人長適邑人曹伯容次適俞拱又次適府學生蔡  
稷莊氏有子三人長應元早卒次應魁例授某衛所千  
戶次應隆鄉貢進士卒其媵謝氏子一人應乾府學生  
女一適鄉貢進士蘇恩今以甲科知秀水縣而金氏無  
出焉先生自登進士為行人為御史皆卓卓有聲及副  
憲山東治兵密雲衆方倚以大用而先生遽以疾歸年  
始六十而超然遠覽為終焉之計且又惓惓以述祖德

明先志以昭示後人為急此其心視夫漏盡鐘鳴行不知止而徬徨於形勢險阨之塗者相去何如哉乃為之比屬其事書之石使凡後來者觀焉而非直以為其子孫告也

故靜菴處士劉翁配鳳孺人合葬墓表

自有宋南渡後中州冠冕之族多聚于吳中其在吾松吳會則魏國王公旦之孫太常少卿逖趙屯則正獻杜公衍之後提幹九成貞溪則忠肅劉公摯之後希孟先

生世賢蓋尤其著者世賢最後至當元之中世與太常  
六世孫一初同時並有高名載于郡牒而杜氏無聞人  
入國朝來則王氏亦漸衰歇夷于齊民而希孟之後若  
石林先生仲禮雲溪先生克誠克誠子琴樂先生鴻怡  
清先生參皆好古尚文兼善琴理並受徵聘顯聞于時  
蓋自忠肅而下歷朝奉趾漕幕著學士甲金部端友提  
舉震孫中書舍人森靜軒處士某至希孟為八世至鴻  
參又四世矣而門閥不衰若此豈偶然者翁希孟五世

世孫而怡清之仲子也諱淵字以靜故別號靜菴性嚴毅直方不喜與俗人接左琴右書日以自娛環堵之室或經月不踰戶限布衣蔬食泊如也伯兄溥以琴受知山陰王聞翁之名走書幣來聘辭弗往王高其風操親繪師襄圖大書靜菴琴幄字遺之其無慕于時而為時所重如此配孺人鳳氏邑大姓悅耕處士傑之女出於豐腴能力勤處約以成翁隱志有桓少君之遺風焉至于厚族嫻和隣里教子孫無弗可為法者故家遺俗固



自異於人也翁生宣德戊申十月二十有八日卒弘治  
己未六月十五日孺人生宣德癸丑四月初六日卒正  
德庚午十一月二十日子一曰鳳章早有賢名永康侯  
徐公奏置其西塾以親老引疾援冠帶歸女三長適秦  
拳次陳訪次姚璧訪監察御史瑀之子璧訓導冕之從  
子孫男三勣太學生勉勗皆習舉子業女二長適鄉貢  
進士周鵷次在室曾孫男一復陽女二初希孟自湖至  
松寓貞溪卒返葬湖之合溪山至石林始定家松之南

橋鎮葬半江西至怡清贅城南顧氏徙彭莊歿因葬焉  
故翁之葬亦彭莊而與怡清異域以兄溥祔而自別焉  
禮也予少讀宋史已知慕忠肅公之為人及壯與鳳章  
游因獲拜公遺像及靜翁于其家又嘗覽觀其譜牒而  
知其世德相承之盛如此鳳章之合孺人於翁之墓也  
伐石表諸墳道而屬予為文嗚呼莫為之先雖美而弗  
彰莫為之後雖盛而弗傳若忠肅公之於劉氏其有以  
先之矣希孟至翁雖才弗及試而世修厥德無忝於先

人翁之子孫繼繼承承方日益昌大則所以為之後者  
豈獨傳而已哉而予以其平生嚮往之心獲表翁墓以  
挂名其家乘昭吾松之多賢又何辭也乃撫其顛末而  
文之使書而刻之石

關氏三世墓表

闕君廷實持其祖父兄三世行事狀詣予再拜而言曰  
惟霽兄弟幸得以末學從縉紳先生後吾祖與吾父兄  
之葬咸辱賜之銘既刻而藏之幽矣惟是墓地越在江

介去先廬稍遠恐灑掃之不時以為他日憂庸伐石表  
諸墳道敢微福於先人乞一言文之非敢覬弗朽鄉隣  
望之庶樵牧之有忌也言已復再拜情懇款如弗勝予  
舊聞高生進之誦君賢又嘗識君仲兄廷用君之斯舉  
有徐氏思亭之意義所不容辭也為之表曰闕氏世為  
上海人家漢成里之分莊至君之祖疇隱翁諱章字彥  
莊者以考文華妣湯孺人之命贅沈氏始居南漣浦是  
墓之地在吳淞江北之某原實疇隱翁所自擇歿因葬

馬君之父存耕處士諱璿字孟儀者葬其左君之兄諱鼎字廷器者葬其右季弟萬壽婦吳氏次馬疇隱翁天性夷坦不好與物競不隨俗低昂勤生力農克振先業存耕之幹蠱如其先人而尤急於濟人鄰之子有鬻母棺以償債者為贖而還之或售其田廬必曲為經理使無失業此其尤表著者自疇隱以來世掌鄉政強威弱撫稅役必均鄉之人咸德之其教子孫各因其才為儒為農咸使有定業嘗曰吾見棟梁而為瓦礫冠冕而降

輿臺學與耕之廢也故其子孫皆克有成立廷器雖降  
年不永不竟其設施而恭謹自將足稱善士疇隱兩娶  
皆沈氏一子即存耕娶潘氏再娶杜氏宋祁國正獻公  
之後珩之女皆崑山人五子其長即廷器次翊字廷用  
工部營繕所大使次即鼎新除江西撫州府儒學訓導  
次翬先卒次輔繼從叔倫之後女四適潘濟陳孟傑丘  
宗器張諫孫男六思明思補思聰思齊思訓思問女四  
人廷器娶同里平氏早卒無子以翬之子思聰為嗣女

一人疇隱生永樂丁亥二月二十九日卒成化壬寅八月十二日享年七十有六存耕生宣德丙午二月十二日卒弘治甲寅十月初八日享年六十有九廷器生正統戊辰七月二十三日卒弘治乙卯八月二十日享年四十有九嗚呼俗之降也久矣巧從事者以詩書為迂濶務功利者以稼穡為徒勞本業廢而詐偽蕃淳風喪而民力匱職此病也有如闕氏三世百年綿衍不墜而考其家上之所訓告下之所稟承不出乎耕學二字廷

實又能載其世德列之墓道以昭示其後人充是意也  
則吳淞之阡雖百世存可也而何曠遠之虞哉疇隱之  
墓銘于故大理評事彭先生汝言誌存耕者為今南安  
府推官張君時震誌廷器者為今都察院司務曹君孚  
若予所按狀則廷實所自述而參以三誌云

慎菴錢君配徐孺人合葬墓表

吳中自宋來多名醫至國朝尤盛凡今京師以醫名者  
大半皆吳人也而盛氏之大方李氏之產難陳氏錢氏



之嬰孺科最著錢氏之老子所識者前太醫院使汝礪  
疏暢高朗處朝市若山林而視疾處方率多奇效既老  
舉猶子仁仲自代而去仁仲繼有名京師人兩稱之慎  
菴處士院使君之母弟而仁仲之父也諱某字某某性  
坦易質直略與院使同而雅志丘園不樂仕進方父祖  
盛時朝之公卿與郡邑大夫造請無虛日聞君賢皆欲  
識之君即再拜謝未嘗一往其於醫視疾緩急不以寒  
暑風雨為解不以地遠近人富貧為後先活人甚多而

口不言利凡修製藥餌必親曰是繫人死生吾何敢忽  
居家孝義嘗析居器物率取故弊以其美讓諸叔人皆  
賢之配徐氏參議傑之孫莊重寡默自為處子以孝稱  
事舅姑處妯娌奉賓祭必以其道平居未嘗出門戶出  
則歸寧而已仁仲少業舉束脩不繼恒脫簪珥資之慎  
菴之疎財尚義閨門之助居多焉正德乙亥處士壽七  
十八孺人壽八十仁仲謀歸養不果方乞詩縉紳為壽而  
處士以九月三十日卒後五日孺人亦卒訃音狎至人

人尤為傷悼云子男二長恩先卒次惠即仁仲新授太醫院御醫女三長適陳鉷都御史汝玉之子次適郭愷次適蔣勲孫男八坤塾圻坡坦基增女四長適施孝次適沈儼餘尚幼曾孫男一予既識院使君又辱交仁仲推類沿流固有以得處士之為人矣雖其韜光沈馨不自表著而凡仁仲之施于國者亦孰非遺訓之所存至於嗣續之蕃昌寵祿之方始則天之報君所謂不於其身於其子孫者又安可誣也君之葬也翰林侍讀朱先生

懋中為之銘太醫院判盧君宗尹復為仁仲請表其墓  
道予故掇其大略書之使後之人知錢氏之醫其名於  
時者如彼而隱而弗見者又復有斯人也

故諭德東溪沈先生墓表

先生諱燾字良德姓沈氏別號東溪蘇之長洲人也先  
世以醫事宋家汴京有諱某者當建炎初扈駕南渡始  
家于長洲思陵親御翰墨書良惠二字賜之時稱為良  
惠沈氏六世祖元醫學提領諱瑛生彥才為平江路醫

學錄彥才生德輝江浙行省醫學提舉德輝生日章日章生以潛國朝太醫院御醫是為君祖以潛生宙字孟循封奉直大夫歸德州知州是為君父妣楊氏封宜人先生其仲子也少穎異與兄方伯公杰自相師友並有聲庠序間成化丙午以易經薦南畿弘治癸丑擢進士被選入翰林為庶吉士試文優等閣老義興徐公洛陽劉公長沙李公咸器之除國史編修教內書館嚴而善誨諸生皆敬愛之癸亥校正本草以先生家學命為總

裁始就局聞儉人欲假以倖進即上疏力辭人稱其有  
執乙丑修孝廟實錄充纂修官己未封安南王命為正  
使據經執禮凡餽遺悉不受交人尤憚服焉使還滿三  
考陞侍講充經筵講官己巳實錄成賜白金文綺陞右  
春坊右諭德丁內艱起復忽遘疾乞歸疏再上乃得請  
仍諭以即來乙亥四月九日竟不起年六十四其生景  
泰壬申十二月晦日也配蔣氏贈孺人繼配夏氏封孺  
人皆有賢行子男三人長垣夏出次杜次里側室鄭氏

出女二人長適文都御史森子斗次適湯序班旒子太  
學生偉皆夏出也先生偉儀觀寡言語舉動凝然見者  
為竦其接人恭甚遇僕隸下人未嘗疾言遽色博學無  
不通雖星歷著數推測占驗之法皆得其肯綮始居官  
以親老不欲就養即分俸以供之居喪毀瘠四時薦獻  
必以禮事方伯公盡敬至老彌篤己未春闈次當為同  
考以弟譙名未成懇辭不赴其友愛如此疾革方伯公  
問後事曰兄在燾何言遂夷然而逝詩文典雅書蹟楷

慎皆類其為人所著述有東溪稿若干卷予始同先生  
舉禮部又同官翰林二十有餘年先生老成持重遇事  
不苟同年皆取則焉謂當大用而卒止于此故人尤悼  
惜之丙子秋七月十有九日垣以方伯命葬先生於邑  
某山以文都御史狀來請為表誼不得而辭也故為書  
之使刻之隧石後之欲考先生之德者觀於此亦可以  
得其概云

艾坡王先生墓表



宋醫師王君繼先之十八世有曰艾坡先生者諱經字伯常生大明正統癸亥十二月十八日以其家學行于時名聞于京師及四方者五十年正德丙子七月二十六日卒年七十四醫師之後世家姑蘇之長洲先生曾祖諱某號蘭畹者被召入太醫院始遷金陵傳子彥英有二子長文勝仍隸太醫再遷于京師娶范氏文正公希文之後惠民局大使子深之女生英廟端靖安和惠妃始授錦衣衛百戶而無子先生實其弟拱辰之子母

曰顧孺人繼母曰陳孺人年十三以祖命來為之後後  
錦衣生子純復歸拱辰自金陵迎養于京邸而身任錦  
衣家事葬祭錦衣事范氏一如所生養純至于成立嗣  
錦衣職猶同居共爨純死復撫其孤如已子京師人甚  
稱之性剛介不為利趨勢屈雖以戚畹賜章服恒布素  
自如平生非視疾足未嘗入官府達官要人迎請無虛  
日自脉病處方外一語不他及徽王素重之非其藥不  
服及之國邀與之俱先生避不往其所執有如此者與

人交有終始不以生死貳其心聞人父母病及孤子女貧不能立者濟之惟恐後廣平侯袁輅歿先生夢侯來請療其太夫人晨往視之而太夫人果病楊貫之有遺孤子二歲病傷寒先生治之夢貫之來報服藥狀且密有所屬已而問之皆驗蓋其誠意積中不特人知之雖鬼神亦知而信之也郭武定存忠未過時先生與通有無及貴一無所希覬應天衛指揮王敬之言事坐黜以母妻託先生先生撫視周悉敬之忘其謫焉素善楊一

之一之歿為子軾娶其女娶常氏女以配其子英中官  
逆瑾發其先冢暴露者五棺英方貧甚議火之先生執  
不可為割地以葬他如梅都尉子俊之母喪強御史珍  
之子病或出貲以助其斂或起之死而不取一錢其重  
倫理而篤於故舊皆此類也遠方士客京師者問藥無  
弗與亦不質其姓氏及後宦達往往來致謝而先生初  
不記也予始入京鄉人衛景玉數稱先生名自是託交  
餘二十年如一日先生議論勁正取予不苟近之使人

有立所為感者不止藥餌調變之間而今不可作矣於  
乎惜哉先生配趙氏繼鄭氏皆有賢行趙氏有子三人  
長軒次輅次軾並世其家學女二長適沈理留守中衛  
指揮僉事次適楊玉金吾右指揮同知孫男五世茂世  
新世遠世蕃世德女五人以卒之年某月某日葬都城  
西甕山之陽范氏先塋之左錦衣公之次初錦衣卒子  
深憂其子弱使近已而葬既而范日衰落竟以絕嗣先  
生既葬其親乃並加封樹垣其外而合于一歲時祀享

必徧焉常欲作堂其前奉文正公遺像而以子深配功  
雖未就而未始一日忘也先生之心亦何異古人哉嗟  
乎方醫師盛時其活人亦多矣徒以遇知相秦而受思  
陵之寵太厚故終以蒙吝豈知數百年後乃有直已守  
道如先生者為之孫斯不亦有光于先烈哉先生病亟  
時其子輅進藥曰此丹溪方也先生瞋目曰丹溪今不  
死乎卒不飲而獨命以墓文見屬至於再三至不能言  
而猶舉予姓於乎豈先生之明達而猶未抵於忘言邪

故列其系行為之表以答先生之志且使觀于墓者知  
兩家之施報如此亦磨世厚俗之一助云爾

古愚徐處士配汪孺人合葬墓表

開化徐良節葬其父古愚翁妣汪孺人於桃溪之原幾  
三十年矣丁丑試春官不第將注選乃撰次其行事介  
吾友謝錦衣汝容請為表其墓徐氏上世家衢州衢州  
故會稽太末也支縣龍丘有偃王遺廟見昌黎韓公所  
撰碑故衢多徐氏多自以為偃王後然鄉人稱真偃王

後者必曰君之宗云由宋以來族日蕃衍凡再徙始居開化之南墩故又謂之南墩徐氏曾祖伯昌洪武初被薦不起祖昱隱居教授著家範十二條嘗同吾侍郎叔縉宋主事廷玉作浮橋於邑東以濟病涉鄉人德之父鈍字用銛別號尚志讀書通醫學為邑訓科嘗奉檄起民丁從總兵張公討枯蒼亂寇平之傳戍卒數千之廣西比至無一人逃及病死者上官稱之翁其次子也諱綸字弘之廣額高準長身而闊步言論灑然見者為竦



喜讀書不泥章句作字不求工然筆力甚勁格言要論切於身心者輒記憶終身不忘善幹蠱有先識尚志君鼎新居室君以身先衆工不憚勞費室成壯麗名一邑多買荒山蒔穉杉數十萬當其時有及抱者家至今利之諸弟謀徙家鍾龍二山謂決水墾田可以致羨翁往視曰不可地高仰水不能留旱則盡為赤土且荒谷中終歲無絃誦聲子孫雜山氓居久則與俱化矣不聽後其土果不食他亦如所料事諸父及諸母皆若所生庶

弟緇年少別居為極力將護翁卒乃淪落每哭曰二兄  
在我寧至此也教諸子甚嚴自棋博笙管之類不使經  
耳目為擇師必一時名士若徐先生天緒許僉事景暉  
方通判和仲皆厚禮延致之事之甚謹他州郡來學者  
必加延款有勤學飭行者輒舉以勵諸兒曰此亦人子  
也家嘗產駿馬所善徐理八欲之有易以良田數畝者  
翁笑曰吾寧利此而負我故人也卒不與收租粟恒視  
田高下尤戒多取嘗大書屋壁後饒寇至見而義之完

其居而去平生志與言稱言與事符是非可否必以理  
他無所顧忌始而人嗤之既死而論乃定皆稱之曰古  
愚云汪孺人諱閨字守閨刑部郎中敬夫之從孫處士  
永澤翁之女歸徐氏三十年舅姑稱其孝妯娌稱其和  
諸婦子女被其愛惟諸兒有過或與不若已者處輒怒  
形于色不少貸也吾教諭景端與古愚善許為教瑤瑤  
二子會官于外弗果翁歿而先生歸孺人亟遣學馬遂  
皆以有成故居燬于火督諸子一新之數年間盡畢其

婚聘曰吾懼而父之不瞑目也縉紳有為諸子至者必  
盛具延之或辭以為費則曰當其父時兒能致此客若  
是以為薄矣且古人有截髮待賓者果然吾亦不此惜  
也其賢懿有識如此古愚生永樂甲辰十二月二十七  
日卒成化辛丑六月三十日年五十八孺人生宣德丙  
午五月十四日卒弘治己酉七月二十六日年六十四  
子四人長璣義官次曰珩早卒次珪以鄉貢教唐縣擢  
令羅源知欽州卒次瑋即良節新除宿州知州孫男十

一人洪太學生浩洲浙泗縣學生浯洙渝涇渭汭皆幼女四長適蔣績次虞瑞次方紈皆士族子其季未字曾孫男五人女一人惟翁翫驕質直學不為文辭名不登仕籍而行已治家及施于人者皆昭合古人程度身歿之訓猶足以化強暴而保厥家古所謂孝弟力田惇樸有行義者其人歟孺人於翁之生克左右以成其隱志歿又能終教以起其家古所謂挽鹿車和熊丸者其人歟欽州仕雖不達而所至可紀良節清修篤志事業方

新洪浩諸孫繼而起者又未可量也蘇文忠謂古之君子為善子已而責報於天如持左右券交手相付若翁孺人其不庶矣乎是宜書以昭示其後人與其鄉之人且以為勸是為表

敕賜顯聖靈祐宮碑

代作

御馬監太監文安谷公大用早以忠謹事今上于東朝至于今二十有餘年內寄腹心外參軍旅勞績懋著而公寅畏小心日慎一日猶自以人臣之常分未足以罄

其忠報之誠也乃用出其祿賜之餘買地都城之南香山之原八里之莊創建道宮一區以仰為國家蕃禧之祝下為農蠶暘雨祈報禴禳之地蓋天保詩人假神休以答君之遺意而猶不敢以自專也度材庀工具疏以請上覽而嘉之詔賜額曰顯聖靈祐宮命真人楊正璠主其祀事傳宮有地十頃皆蠲其租稅復其徭役仍降璽書護持俾世守之公既得請退而感激思有以闡揚之以侈上之賜而以事之殷顧有所未及也今年春乃

克具其事之始末請書於石植之宮庭以顯示於來世  
惟我明奄有方夏明德之馨徹于穹淵天地神祇祇若  
歆悅錫祉流祥於千萬年永永無極而郊社壇壝禮秩  
之餘名區靈祠出於臣民之所崇戴而非有戾於教者  
上亦因而聽之益廣誠敬以迎天休而況於帷幄心膺  
之臣以其忠孝愛敬之誠崇水木本源之報則其當天  
心而膺景貺夫豈不宜而其宏規傑構顯號隆名播之  
聲詩被之金石亦寧不為玄教之休光太平之美觀哉



是役也經始於正德庚午春正月落成於是歲某月凡為屋三百四十有八間外為三門左右重樓以棲鐘鼓其內複殿迴廊星壇月榭下至焚修之廬器物之藏庖滌之室皆嚴邃潔清各稱其制正殿所祀則北方玄武之神道家所謂元始分形為淨樂國王之子得道上升主鎮北極者是能祛逐妖邪保民護世其後南極東華九宮太乙皆天之貴神握符秉衡臨照下土而文昌以下諸神亦皆有功於民物者初宮之未建公先作墳祠

為全歸之所賜額曰褒賢宮既迄功又為佛宮於其側  
賜寺額曰永恩左佛右仙樓觀相望鐘鼓相聞金碧蒼  
翠炫晃數里創而見者真以為化人之宮焉惟公際時  
承恩崇極貴寵而厚於為國薄於奉身故得以其餘力  
成此勝事於乎盛矣敢附新宮之義詩以揚之其詩曰  
常融之天玉虛庭神君臨之赫以明介而玄衣旗七星  
跣立披髮剛風生下憫濁世淪穢腥手握神劒驅雷霆  
洞陰一戰四海澄邇來倏忽三千齡新宮崇崇麗天京

誰其作者金閨英主恩如天臣莫勝何以報之神是憑  
玉垣紫宇從百靈想像紫霄朝上清琅風中宵韻流鈴  
鸞歌鳳嘯疑有聲飄然而往空青冥神功巍巍不可名  
神威赫赫天與行德善有福淫有刑元洞玉歷炳丹青  
惟天常清地常寧民壽考今年穀登政與化兮躋隆平  
臣與主兮交顯榮神之祀兮百世承

都察院右副都御史張公神道碑

張在宋為汴人南渡時始遷于杭再徙華亭華亭之張

故為著姓公之族以儒素班焉然至公始大家鶴城書  
院西時呼為鶴城張云高祖元亨曾祖天祐祖仲清並  
有令名晦迹田里考遜字時敏讀書善吟與陸夢菴潤  
玉王雪航公佩等為詩社十友著在郡牒妣余氏有賢  
行實生公諱誥字汝欽幼而簡重不與羣兒伍少長銳  
志于學為文章操筆輒成見者歎異以府學生領天順  
己卯鄉薦登成化丙戌進士改翰林庶吉士受業劉文  
安公定之為公所器許戊子拜監察御史巡視長蘆鹽

場平時豪猾倚權勢作姦罔利者悉裁以法諸場為清  
甲午按湖廣吏有望風自引退者監鄉試選舉得人所  
錄文至今以為式諸生坐歲考弗稱有停廩踰年者公  
謂不稱當黜不當停其廩移文所司以為非朝廷制所  
司懼即為改正其移文諸司亦版行之丁酉陞廣東按  
察副使巡督海道鄉人有附番商越境牟利者公嚴為  
之禁其弊遂絕丁內外艱服闋改四川陞按察使弘治  
初蜀土連饑公請于朝停荆襄岳武等衛運得米二十

餘萬石又發廣濟庫銀易米數十萬石隨所在貯之委  
廉能吏計口支給又倣韓魏公及朱子法十步一竈為  
糜粥以食老穉之不能自食者所全活不勝計蜀人德  
之陞貴州左布政使閱帑藏得羨銀數萬兩有以利動  
公者公正色曰此民之脂膏可以自私邪命吏著之籍  
為賑濟備言者愧服陞都察院右副都御史巡撫雲南  
雲南去闕庭遠積有疑獄至十餘年不決公原其情為  
剖析言于上悉見宥免竹子諸山箐夷羅構亂刼掠為

居民害或請以兵五路進勦者公止之曰彼為盜豈本  
心迫饑寒耳村寨固有良民今加兵且玉石俱碎非撫  
綏意乃自為文選吏為夷民信服者分持往諭之降者  
相屬前後以千數餘黨各散去竟不煩兵而罷木邦孟  
密相讐殺諭之弗聽聽輒復反公曰此非可以口舌勝  
也檄諸道各練兵積粟米如山為必討計二虜始懼而  
自戢朝廷嘉公功有綵幣銀牌之賜蓋公之臨事伸縮  
卷舒文武並用有如此者以年及思休累上乞骸之疏

戊午冬得請來歸監軍總兵而下盛供帳餞于數十里  
外且出白金為贐公甘不受咸歎息而返閒居十三年  
治丘壠葺廬舍教子姪讀書為身後計親戚之貧者衣  
食之故舊之失所者拯濟之鄉鄰有疾病死喪而不給  
者周卹之蓋其不盡施而及於桑梓者又如此公生宣  
德癸丑正月二十有三日卒以正德辛未九月十三日  
享年七十有九配謝氏祈州判官嗣宗之女先公三年  
卒側室周氏朱氏韓氏子男四文英文魁文明俱夭其



季曰文貴女四人義官林璋縣丞沈高鄉貢進士李元祥太學生陸瀛其壻也文貴以公卒之明年某月某日葬公於佘山新塋刑部郎中周君鳴玉既誌諸幽矣公官九列於令得立碑文貴泣拜以文請惟公以儒家子奮身取高第績學詞林出掌邦憲累官至第二品積階至正奉大夫勲至正治卿贈封其父祖至通議大夫右副都御史祖母母妻皆淑人蔭其子文貴以髫年入太學風采在朝廷威惠在藩服名德在鄉里而又享有高

壽正寢考終可謂裕後光前終始無憾者矣系之銘曰  
侃侃張公望于鶴城甲科文苑名配列星為中執法臺  
閣風生出殿方夏遠戢邇寧帝曰汝來公倦于行南粵  
東齊梁益荆湖有雷有風公馬載驅龍潭鳳山松陵具  
區雲消浪平公歸在吳公有長才宜正有服公之忠誠  
垂老彌篤安車弗至白雲遽來嗣子擗踊邦國興哀藏  
于北山其永終吉松楸鬱然公手所植刻詩墓道過者  
必式

左軍都督府都督僉事張公神道碑

正德戊寅春二月三十日征西前將軍左都督府都督  
僉事張公卒于京師之私第事聞命有司治塋賜祭如  
故事嗣子輒將以明年某月某日葬公於都城西北窰  
子頭祖塋之原植碑墓道具事狀乞予為之文按公諱  
安字定之世為和州祥鸞鄉人高祖興少籍戎伍深沈  
有勇力聞太祖起淮西神武不殺遂挺劍歸焉以功授  
天策衛百戶改大同左衛卒曾祖政祖源世傳武略源

從忠國公略地觀音山及金山等處斬馘陞正千戶父  
瑛從定遠伯追敵磨兒山黑石崖戰有奇功陞指揮同  
知公生而凝重有至性年二十餘嘗刲股以愈母疾人  
稱其孝既嗣職慷慨思奮以功業自許成化中都督孫  
公西征尚書王公越擣威寧海子公皆從行皆身先士  
卒斬獲功為多歷陞指揮使山西行都司都指揮僉事  
守大同右衛殺滅無算獲戰馬夷器陞都指揮同知又  
以二千人禦勁敵數千連戰經二日多所斬獲陞都指


揮使弘治初充大同路游擊將軍八年充副總兵協守  
寧夏率衆出賀蘭山擣賊巢穴斬首百餘獲駝馬甚衆  
遂有都督僉事之擢佩靖虜副將軍印充總兵官鎮守  
延綏尋改佩鎮西將軍印在鎮累立戰功又收獲邊圉  
小王子勅書駝馬胡樂之屬璽書嘉獎有文綺白金蟒  
龍之賜蟒衣在當時甚重非大臣不易得公自是凡三  
受賜馬正德戊辰寧夏警報至上思公舊效命佩征西  
將軍印充總兵官往鎮其地明年移大同又明年以疾

乞休命歸制印以所居官就第蓋優游林下者凡十年而終公為人戟髯魁幹望之偉然臨陳好衣阜甲乘黑騮握鐵簡見者謂張翼德尉遲敬德復生更歷三鎮皆有勲績尚書鈞陽馬公論一時邊將必以公為稱首時皆謂非過云公生於正統甲子某月某日比卒享年七十五曾祖祖考俱以公貴贈驃騎將軍左軍都督府都督僉事曾祖妣余氏祖妣趙氏俱贈夫人妣光氏封太夫人配盛氏繼李氏潘氏俱封夫人子男二長即輓盛

夫人出例襲指揮使以先有功陞都指揮僉事進同知  
今以副總兵協守大同次軌潘氏出大同前衛正千戶  
女四長適都指揮劉漢次適參將李淳次適都指揮李  
澤次適指揮畢鉞嗣子漢孫男一曰本女一許嫁  
指揮林某嗣子某子既序公事復為詩以系之詩曰  
真人龍飛豪傑雲從其從伊何江淮西東祥鸞之張與  
鸞並翀翼龍以飛咸策有功侃侃元孫既孝且忠載其  
世勲益振以隆乃握銀菟乃長元戎西歷綏靈北殿雲

中朝家倚之長城隱空既老而休蕭然京邸杖屨綸巾  
觴豆壺矢有功有名亦有壽社還歸帝鄉白雲萬里都  
城之西窰子之原烈祖所藏松楸鬱然維帝念功卹典  
有駢窰窰既崇儀章副焉有穹者碑于墓之道我作銘  
詩維後之詔水濬而長木植而蕃厲爾弓冶飭爾豆蓬  
瑶圖萬年茲石弗刊





東江家藏集卷二十九

欽定四庫全書

集部

東江家藏集卷三十

詳校官監察御史<sub>臣</sub>龔驂文

中書<sub>臣</sub>劉源溥覆勘

總校官知縣<sub>臣</sub>繆琪

校對官檢討<sub>臣</sub>王鍾健

謄錄監生<sub>臣</sub>王永榮

欽定四庫全書

東江家藏集卷三十

中集二十六

北游稿

明顧清撰

誌銘十九首

明故湖廣參議張公墓誌銘

弘治六年夏四月中書舍人直內閣上海張公濟民出  
參議荆南藩府兼督泰嶽太和山十月抵荆南明年正

月十三日卒先卒二日登嶽山徧行祠宮顧道流曰吾此行不再矣公等宜勤修以答天貺既歸謂家人曰山中佳絕吾意不欲來為汝等累吾念耳是夕命浴具新衣詰朝視事坐堂上端瞑而逝治棺間日貌如生予始聞甚異之既數月公壻喬君時章來請銘公墓乃具言憶予初入京以鄉後進拜公於私第問處已接人之要公以誠教之曰某迂拙不知其他平生所守惟此人初或未識久而自信當時深敬其言別公經歲未嘗一日

忘孰意公一往不來而予竟銘其墓石邪公諱穀濟民  
其字別號謙齋曾祖贈監察御史諱世良祖諱衡以永  
樂乙未進士為御史立朝不阿卒于貶所父諱芹以公  
貴贈中書舍人母贈孺人姓姚氏公生而純雅正統己  
巳入縣庠為弟子員累不利場屋成化戊子以歲貢領  
鄉薦乙未擢進士距其祖登科之歲甲子適周鄉人傳  
以為美談丙申拜中書舍人入直文淵閣尋引疾歸居  
六年今上即位素聞公善書驛召還與修憲廟實錄加

陞俸二級供內職如故又三年陞今官以卒公自為布衣薄於榮利嘗曰仕宦如雕籠畜鳥耳故雖官禁廷歷華要而山林之志終未嘗忘其引疾歸浩然有終老之意日引騷人文士與之相應和所作尚理致關風教多可傳者既起與纂修凡同事者皆進官而公止加俸處之裕如其參荆藩近宋人所謂奉祠者公方樂之而遂以告終矣公風度清遠眉目如畫與人言從容簡當必以道義宅心平易而端謹和厚望而知為篤行君子易

簣之際可以見所養矣家素貧事母至孝養二姊終始  
以禮在鄉黨濟危成美口未嘗言功晚得科第而位不  
滿德士論尤追惜之初娶黃氏無子繼娶方氏有三女  
丈夫子二人出側室某氏長拙次抑壻長即時章名煜  
翰林修撰喬維翰子次則建寧知府劉璵之子襄吏部  
郎中戴春之子儉其卒之歲距生時宣德癸丑得六十  
有二年葬以今年某月某日墓在上海縣北某鄉某原  
銘曰

白雲黃鶴依我阿閣鳴玉莪冠志在青山受爵孔廉德  
則允厚我銘于丘以俟其後

新昌呂處士墓誌銘

應天少尹新昌呂君獻狀其世父松泉翁之行授翁之  
子璉謁予乞銘且以書來曰翁居家孝友處鄉黨以信  
義雖不為世用充其心將達之天下可也君為給事中  
予及同朝知其言可信璉又吾李君原復故人也故不  
容於辭按狀翁諱達字好道別號松泉其先幽州安次



人宋正惠公某某之後始祖大理評事諱億徙青州宣和間避地浙東遂為新昌人曾祖諱子華避元運不仕祖諱九思國初為行人官至袁州經歷考諱存心亦不仕母張氏王渡世族翁生七歲知讀書及長益肆力於學凡篇籍無所不考性和易與人居未始失色於功利泊如而勇於為義不避艱險祖墓有田為勢家奪七十年矣翁糾率子姓出帑以復之置守視焉鄉人義之樵牧相戒不敢犯二姪璵璠早孤撫而教之後皆有成立

平居坐一室晨起躬灑掃服食器用皆有常所晚年以家事付諸子日嘯傲湖山間曰吾性落魄不能營產利為子孫謀然平生無忤害心頗以此遺之耳弘治甲寅八月疾作十月而病二十有八日竟卒其生永樂己丑七月二十一日也享年八十有六配俞氏贈嘉議大夫禮部右侍郎清節先生之女子男四長斌次球先公卒次塘次璉邑庠生女一適醴泉章萍孫男十女二曾孫五葬以某年月某日翁喜為詩遇佳山水必有作若天

姥沃洲華頂石橋諸篇皆可諷詠尤善琴理旁通岐軒氏之學蓋其才行有足尚者云銘曰

木之喬封厥根深畊後獲實且蕃新昌之呂正惠孫違亂俟明如蠓蹲隆築而構翁復敦有其發之斯復原鏡石嵌幽昭後昆

南京府軍衛百戶周君墓誌銘

君諱全字永誠姓周氏松江上海人襲父廕為南京府軍衛中所百戶成化戊戌致其事弘治丙辰秋八月十

四日卒年八十初君父信以材力自負當元之季見天下亂思樹立功業會大將軍定中原仗劍以從累奏奇捷策功授昭信校尉府軍衛百戶君幼而不羣大為昭信公所奇愛長益好學嘗兩試有司不利始絕意進取昭信卒以嫡長世其官性至孝事母張安人曲盡子職平居不妄言笑至道古今論成敗得失則亹亹終日若將不可窮者未嘗以色假人同官有失面折不少恕或為陳古賢將事其論侃侃聽者為竦退則無一言要官

達人或不可其意亦拂衣去不顧凡世所玩好狗馬聲  
色之類一不累於心晚年闢園池蒔花藥引故人賓客  
觴咏其中以為樂若未嘗有官祿者配吳氏封安人子  
男二長琮襲廕次瑾以子鉞尚秀府順義郡主推恩授  
兵馬指揮孫男四鑑鎧次即儀賓次曰鏞曾孫男一女  
三君之將葬儀賓以瑾命奉唐進士錦所為狀來乞銘  
惟君載其世勲嗣有祿爵率履飭躬克享高壽子承先  
休孫尚貴主榮寵光華貴于鄉邦可謂盛矣銘不可以

無作銘曰

英皇之孫秀郎之女厥配維周君實其祖維君之先奮  
迹義旅君承于休克大其嘏始志于文中續以武一傳  
而再遂倩藩府水流于泉木茂于根由前者勲由後者  
親孰祐之全萃君之身鍾山之原鬱鬱松筠宗社萬年  
君居永存有後觀者稽此石文

靜菴居士墓誌銘

故宋李太尉顯忠有裔孫曰尹亨字克復者以大明天

順四年庚辰四月七日卒葬玉山縣之東原後三十四年當弘治癸丑予及其子寬同舉於禮部又四年丁巳寬以秋官主事理刑獄於江淮將行以公行事狀泣拜授予曰吾四歲而孤惟吾先君之餘麻是庇是承以克有今日今先君葬幾四十年矣而幽堂之石猶未有刻詞吾誠日夜悲痛念無以白于後人今吾子既獲同年又職在紀載其無辭予讀宋史至太尉父子破家殉國事未嘗不壯其忠節而哀其功之不成意其子孫當必

有興者乃今幸得與主事同朝列又獲銘其先人以挂  
名于家乘其何辭按李氏故青澗人自太尉脫青澗之  
難歸臨安其子遜自臨安再徙至玉山新安隄遂為玉  
山人大父敬仁父希哲皆不仕公性孝愛事其親先意  
承志不忍傷祖母詹病疽日親侍左右湯藥必嘗夜即  
卧牀下以候安否及卒毀瘁不自勝其事兄尤篤於敬  
讓既長不忍異居至不得已田廬婢僕惟兄命不敢以  
已先新安地隘改築室西湖故居直數千緡以讓其從



兄不少吝鄉之言雍睦者必推公宣德間歲祲邑有流殍公白其父出家窖數千斛以賑之曰人無食而我獨饒吾不忍也或以子女質者及嫁期以聘貲來贖公惻然還之焚其券不取一錢鄉人感其義有垂泣者州縣以耆宿義士召皆辭不往惟酷喜讀書教子弟嘗歎曰吾家以先代忠臣之裔為邑故家亦惟是詩書之澤不墜前聞耳乃遣其兄子亮為縣學生臨歿又以寬囑其母俾無失教亮取己卯鄉薦除懷安尹判廣州為時能

吏寬舉進士為省郎皆公遺訓也公生於永樂甲午十一月二十四日其卒之年方四十有六又晦迹田里故未有以聞于時然其家庭孝友之常存心處事之實信于親聞於鄉邦如璞玉淵珠終不能掩其光也古之所謂善人者公豈其人歟公四子長志次德次匡寬其季也女二壻某某孫男二人皆公歿後生云銘曰

李世青澗為王虎臣奇也殉國族胥以淪矯矯顯忠挺節來奔天眷忠孝既熄而燭玉山之陽瓜瓞綿綿惟靜

菴叟既仁且賢族姻黨比吾無間然天嗇之年厥得已  
多爾公爾侯其復匪遐鬱鬱東原有拱松梓我銘曷徵  
公有令子

沈處士墓誌銘

處士以丙辰秋來視其子恩於京師恩舉禮部予辱預  
有事又鄉人也故處士數往還視其貌恭而和聽其言  
質而有倫使之年甫四十有七齒髮壯茂鬱鬱如春松  
予謂其福之未艾也歸數月有傳其訃音者予始力拒

之曰烏有强健如君賢有禮如君而遽及是哉明日恩  
衰經纍然踵門以誌銘請予蓋甚惑焉即如是人亦何  
勸為善而彼疾步健談馳騁於當日者又可足恃邪既  
以悼君又哀恩甫得一第而遽哭其親榮不足以塞悲  
也銘其可辭按處士諱鎡字時用別號松雲其先浙之  
嘉禾人元季高祖居仁避兵徙上海遂為上海人居仁  
生德弘德弘生晟晟生環號梅月翁娶同邑尹氏實生  
君弱不好弄稍長知讀書事舉子業父母以獨子不欲

使從宦君弗敢違甫冠梅月翁卒殮殯葬送一以禮鄉人稱之歲時祭祀恒涕泗曰祭之豐不如養之薄也尹孺人孀居所以慰悅其心者無不至迎其母沈安人養于家卒又倡諸甥治喪事庶母弟許贅劉氏壯弗能婚為具禮聘之事諸父及待其兄弟下至僕使皆曲有恩意鄉人負穀百石鏹十千焚其券傭奴有去而復來行盜者衆執以見諭以義而釋之作棺以瘞露骼為杠梁以濟不通凡義事率以身先故人多德君其卒也皆涕

泣云生以景泰庚午六月二十三日卒以丙辰十二月十五日初娶談氏有二女卒繼娶謝氏子男四人長即恩次三人俱夭女長適陸淮卒次適韓惠孫女二葬以某年某月某日墓在方溪北去家僅二里銘曰行弗異流俗惟孝友于親名不出州里而澤加于民不永其年天胡以然以大其後人

施孺人墓誌銘

吾鄉人潘君克承有女嫁為施秀才聲遠妻聲遠鶴灘

太史門人也故往還最習聲遠試有司數不利潘氏能  
慰之以命且勸之學聲遠之挫而不折益進而自強蓋  
預有助之者人以是知潘氏之賢潘氏有二子長寅次  
天祿戊午歲相繼夭因感傷致疾今年劇甚三月十五  
日竟卒得年僅三十悲夫聲遠以四月八日葬于都城  
南東臯村先塋來請銘其墓潘氏母袁早世事繼母李  
得其歡心李亦視之如已出族人稱焉既嫁又能相其  
夫及卒舅姑思其孝妯娌感其義妾媵童使懷其恩人

謂之賢其可以為賢矣乃為叙而銘之潘氏生成化癸巳四月二十日卒之歲弘治十五年壬戌也銘曰

處而孝惟姆之教嫁而宜惟君子之毗子而弗育其有時誰戕其真止於斯東臯之村鬱乎嵬殯宮沈沈夜未熙美玉深藏吁矣悲

南平令陸君墓誌銘

陸君如崧治南平之三年為弘治壬戌其兄清豐令如崑朝京師有以君凶問告者予始甚疑之會如崑無言



久而寂然謂傳者妄耳既兩月如崑書來曰吾弟真死  
矣傳之者信非妄矣先生素知之其將與哀之若因而  
賜之銘亦吾弟之望也壬子冬予隨計北上會如崑兄  
弟於淮陰自是辱交焉及兩君擢進士予有事場屋往  
來益親如崑在甸服君在閩中皆卓然樹聲績予又私  
以為故人喜謂清近可立致也而孰謂君止於是邪君  
初任羅源在萬山中巖阻瘴癘咸謂非人所居君初病  
起縈然攜束書就道見者皆憂之既至興滯補弊甫八

月百廢具興而身且無恙用是以堪治劇改南平南平  
當八閩喉襟土瘠而民蕃使檄供需連絡無虛日君至  
當大火後日夜撫循且為之經理未幾井邑一新而民  
不知病其事上恭而有禮遇吏民平易可親至理之所  
在毅然不可奪也居官不五年累為部使者所稱薦論  
閩吏之賢必以君為稱首焉辛酉冬南平大疫邑僚有  
舉室盡者吏咸請避之君綜理弗顧用是得疾以至不  
起十月十八日也君體貌明粹自幼凝重寡言笑望之

王立其守身如處子和厚誠篤恂恂若無能至居官秉  
法守禮斤析刀解和而能剛斷而不苛此則人所難也  
所著有省齋紀行等集紀行集則予在淮陰已見之溫  
麗典則迺出時輩而今其已矣嗚呼惜哉君世家湖州  
之歸安實宋廣靈侯圭之裔曾祖順祖敬皆不仕考震  
四川瀘州知州妣毛配俞氏州判官光佐女予二階陽  
女一許嫁御史陳霖子某君生成化辛卯七月初六日  
比卒年三十一葬以壬戌十月某日墓在烏程縣弁山

之陽銘曰

陸望雲間施于廣靈瀘州之賢以有南平其人夙成其政有經而不永其齡尚固斯局天乎可徵其肩將興

先妣封孺人陸氏墓誌

嗚呼清不孝先妣疾莫養含斂莫親死無以自致者尚幸得從搢紳先生後比訃聞告哀于諸公吏部侍郎吳郡王公許銘于幽堂太常少卿太原喬君希大既篆其蓋石矣屬公繼以憂去位不肖不忍復言銜恤來歸日

夜悲咎既罪逆如此惟是所以為不朽計圖未減於萬  
一者又弗獲順遂其天寶殛之將昭布其大戾弗可庇  
逭用弗敢重累于達者謹輟哭叙次其系行自書之以  
納於墓先妣姓陸氏世望華亭與顧同里居祖士能有  
隱操父裝方嚴重信義尤為鄉人所敬服有不善惟恐  
其聞之於其卒私謚為秉直處士娶馬氏實生先妣馬  
氏孝慈貞順先妣之性行如之為秉直翁所鍾愛翁慎  
交與獨善先大父遺善府君謂世蓄德後當有興者而

尤喜家君之倜儻故先妣歸焉大父素輕財無厚產又方以分其外兄弟之同居者以是家益貧先妣既入門姑辛服粗力女事以佐耕殖有人所弗能堪者自傷不及事先姑奉先大父曲盡愛敬歲時祭享必致其誠潔賓客必豐遇宗婣尤有恩意終身無間言者家君之處約而能亢其宗先妣之助也始產得不肖幼而多疾提攜撫鞠劬苦倍諸弟稍長能就學師資書札之費多出自緝紡不肖之粗知章句先大父家君之訓而使無他

顧以專所習者先妣之德也不肖官滿三歲蒙恩封孺人時年已高荆布絲麻不少異平日家人北來必傳語不肖俾盡心所事請迎養輒弗許曰吾在此自樂也比得疾思見不肖不肖頑弗覺知而遂以永絕矣嗚呼痛哉先妣生宣德己酉十一月二十八日卒以弘治壬戌十二月十日享年七十有四子五長即不肖次積慎勤勉積勉皆天孫男六天彝天叙天秩天申天與天祐天叙亦天女五其存二人最幼曾孫男一應陽女一俱幼

先妣之疾也屬家君無別治墳得祔先姑足矣及是度地已迫家君不忍違稍拓其左以歲癸亥十一月二十一日甲申襄事墓坐癸向丁龜筮並吉從先兆也尚永固斯宅以寧我後人

故涿州知州何公墓誌銘

公諱正字廷直其先涇州人曾祖諱懃祖諱寧皆不仕考源文安令陞知通州再陞知襄陽府妣李氏初封孺人贈宜人襄陽公有善政民愛而留之因遂家焉公剛



毅儉約輕貨財重意氣年十八從宦文安勵志力學提  
學李御史見其文大稱之襄陽公守通州遂進學於考  
功劉從吉翰林吳希賢二先生自是聞見日博學以大  
就而公志在用世羣居講習於政事體要必究心焉不  
屑屑於文藝也既領鄉薦入太學大司成襄陵邢公盧  
氏耿公皆器之成化辛丑除河南長葛令時方旱蝗禱  
于神即雨蝗不為害民歌之為福星邑素無儲積為經  
理市大豆若干貯之倉甲辰大侵人相食日煮豆以食

之又分布饑民於大家俾傭作以食存活數千人時各  
郡盜起公設長巡兵擇盜之改行者四人分四郊督捕  
鄰壤震驚而公境內帖然明年復旱為築堰於漆洧引  
水以溉田凡數百頃及夏麥熟而魚亦可習民咸利之  
既而市畊牛散穀種潤色均徭裁省浮費未幾民力遂  
完賢能之聲為一省冠丁父憂改博野博野故多右族  
以勢躡鄉里公直道以行皆斂戢不敢肆秩滿民攀留  
不得去巡撫張公言于上復留三年弘治丙辰陞知涿

州州素號難治中貴禁軍千餘家與居民錯處而王官之將使萬國之來廷冠蓋往還館穀迎將無虛日公先以法齊衆乃節量州計以里役錢散諸民俾畜雞豚具芻粟以待故州治肅清而民力省半政聲日馳而公老倦游矣是歲乞休致會長子宗理守徐州以最績聞推恩加奉直大夫協正庶尹配劉氏贈宜人遂就養于徐迤邐歸襄陽癸亥十二月十八日以疾終正寢距生時正統丙辰實六十有八年間居者八年矣公信道誠篤

行其所志不惑于他在太學與保定李文穎慶陽韓廷  
器相友善京城疫韓李皆卧病公日走其門視炊爨具  
湯藥無所畏避李歿為買棺以斂哭之盡哀韓感其誼  
遂定婚焉潼關單忠信於公為同年生夫婦客死公經  
紀扶護為子娶其女為其子娶婦且遣從名醫學卒全  
其家孤兄子宗良宗賢及弟溥公撫之如子親課以學  
後溥領鄉薦宗賢舉進士第皆賴公之教也既歸襄陽  
惟訓子孫課耕植或徜徉山水間其非道不交非義不

取蓋終身如一日也初娶劉宜人先卒繼娶薛氏以事  
出側室褚氏子八人宗理庚戌進士自徐州陞同知松  
江府宗性生員宗本宗乾皆業儒宗岳宗岱宗恒褚氏  
出也女五長適太學生韓永相次適周自振次適李憲  
二在室孫男十二人女五人俱幼公初葬襄陽公徧求  
名山得吉兆於鹿門山之西原宜人劉氏祔及是同知  
將率諸弟以年月日奉公柩而合焉予初舉進士辱交  
同知君宗乾在京師又嘗從予學故同知君以墓石之

銘為託而予不得辭銘曰

行之確其充以學仕而賢其歸也全不竟厥施其後有  
輝孰云彼蒼而罔人知鹿門之西鬱乎新阡良吏所藏  
過者式旃

故承事郎呂君墓誌銘

溫之永嘉羅溪有義士曰呂君諱斌字旻質實故宋丞  
相申國正獻公之裔申國六世孫從訓為扶溝令子光  
遠避金亂自洛負母泛海之永嘉遂占籍焉至君又十

一世矣考定敦尚信義景泰中以入粟得官娶祥興吳氏實生君性方嚴簡重尤篤于倫理弱冠持門戶卓卓能自立平居必正衣冠不飲酒至奉祭祀燕賓客必極其豐潔以先世名家遭亂轉徙夷于民伍思有以振起之成化己亥作新祠於正寢之東又為堂以奉文穆文靖正獻三公遺像修家譜以合族立家塾以嚴教凡有關於禮教者竭力為之冢宰樂清章公綸戶部尚書涿郡殷公謙為記其事其居鄉强悍者飭之柔良者扶之

貧無以為生病無以給醫藥死而無以棺斂者必周之鄉例舉錢十分而息五君仍減其一不能償者輒貫之凡再出粟賑饑為石者二千有二百代輸通都鹽米若干造海壇江頭二渡舟以濟往來作渡口館以泊行旅作石與東岸上塘大壩四石梁甃樂清館頭塘及渡口等路凡數千餘丈費穀以數千計郡邑獄囚冬施以藁薦夏資以湯藥其施予不吝且周悉如此然至於異端釋老之徒則痛絕之未嘗少與接也成化丙戌授承事



郎階正七品壬寅立石表門弘治辛酉朝廷降璽書旌其義郡守鄧侯為立傳仍榜旌善亭為後世法鄉邦遠近無不以長者稱之年七十八以甲子六月一日卒其生宣德丁未十一月初九日也配城東王氏先四年卒側室張氏子男六人梓榮榮樾松椿梓馨學訓科松郡庠生女三長適江陰令李本長孫儀次適吳恩次吳信皆祥興族孫男九照勲耿煦灼爍煥烜煒照亦郡庠生女六長適中書舍人趙式子公澤次適趙愷次適欽令

樂清朱諫子守宣次幼梓將以某年某月某日奉君柩  
葬南輿之原時吾郡通守閩中何侯方來自永嘉梓因  
侯以乞銘其言故有徵也乃為銘銘曰

申嗣七傳自洛而溫衰服再窮乃見義人德施于鄉為  
帝外臣弗惑異學於前人有芬鴈山莪莪莫彼海邦羅  
溪之門南輿之堂後千百年鬱其相望兮

澹齋劉處士孺人張氏合葬誌銘

上海儒學訓導安寧劉先生以官將九載而母年近八

十常計日望歸將稱壽於堂下三月計至先生哀痛推  
仆幾不能生既乃衰服纍然以吾友高生企狀乞予銘  
墓石且曰吾先君葬若干年而墓亦未銘行將奉吾母  
而合焉茲銘若有待也予官于京十年不得歸而母氏  
棄背荼毒怨咎至今無以措其心而先生重以是委予  
譬則痛定之人聞痛者之呻吟其身之弗寧而又何以  
為先生役耶重念予鄙拙無似而先生匍匐萬里束裝  
臡擢需予言而後行此其意又弗忍違者乃黽勉操筆

即企狀序而銘焉序曰處士諱正字以正別號澹齋世家雲南之安寧祖鳴容父寺皆不仕母楊氏處士為人樂善而好施遇貧者必周之負債而不能償者焚其券兄庸早世撫其孤嫁其女養幼弟皆曲有恩意鄉邦稱之孺人姓張氏為同邑質軒處士某之女事舅姑盡孝敬相處士儉而能勤先生初教射洪嘗迎養于官舍都御史郭公鏜楊公澄而下咸賦詩為壽薦紳榮之處士生永樂戊戌正月十四日年五十七以成化甲午六月

十二日卒葬州境虎丘山之祖塋孺人生宣德戊申十月初十日以弘治甲子八月二十一日卒年七十有八子男四長聰次昱即先生以明經領薦就乙榜歷今官次明早卒其季曰昭女三適某適某孫男十三長安早卒次寧宰官寬宦襄定宛守宙女五人銘曰

子仕而貴親之榮貴不及養生何以為情孤舟搖搖指滇城難宿草兮啓新塋不有射洪恨千齡嗚呼門生誄行太史銘九原有知庶爾寧

明故翰林院編修周公配太安人朱氏合葬誌

銘

工部員外郎周君將奉其母太安人朱氏柩合葬於先  
太史之墓乃追述太史及安人之系行為狀泣拜授予  
曰珮不幸早失吾先君賴吾母以有今日先君懿行孔  
多珮方幼無所識知吾母恒誦言以為訓故猶能記臆  
一二先君性恬靜篤于孝友家故貧刻志于學讀書終  
日不少休夜二鼓方寐雞鳴輒起由是書無不通自洙

泗濂洛百氏諸子之言中究旁達若繩引珠貫而尤精  
于史學至終卷默誦不差弱冠作書上提學彭御史御  
史稱之入府學為弟子員為教授廬陵孫先生所器重  
同學有十才子馳聲于時先君為之冠正統丁卯應天  
府鄉試以第一人薦禮部景泰辛未廷試以進士出身  
第二人入翰林為庶吉士除國史編修一時輩流論行  
誼超卓問學該貫者獨推先君甲戌以天旱奉命禱東  
嶽丁內艱歸廬居三年足未嘗入官府亦未嘗以貧為

戚識者皆以大用期先君而降年不永四十六而遽歿  
嗚呼痛哉吾母出華亭舊族寡笑言甘淡薄尤勤於治  
生既喪吾先君躬早夜織紡以鞠吾兄弟及諸妹珮長  
就學脫簪珥以資之不吝少怠則垂泣以戒曰汝不聞  
汝先君之勤苦乎故珮亦勉強以有成立弘治某年以  
工部主事滿考贈先君如珮官封母為太安人庚申請  
于朝得歸侍養居膝下僅六年而禍及矣悲夫珮既不  
獲事先君幸有母得少自盡今既無及而先君之喪太



守葉公冕知縣楊公昕實助襄事同穴之制已具又無  
所致其力焉維墓石有辭將圖于永久是猶若可為者  
敢以屬吾子清少讀歐陽公瀧岡阡表見其述母夫人  
叙崇公遺訓事未嘗不三復而悲之今工部君之自述  
其有異哉歐公四歲喪崇公鄭夫人親教以成後六十  
年而始表于墓君十二而喪先太史亦太安人教以有  
成塋墓之克合且四十有八年矣崇公之於太史工部  
君之與歐公其出處名位不必盡同而各一時之賢人

兩母之保貞節于艱難以克成其子事亦無異獨以清  
之不文乃幸辱從君後而得托名墓石以同于不朽是  
則弗稱而不容于辭也乃為叙而銘之太史名興字廷  
參別號心齋其先故汴人始祖仕宋為某團練使在元  
有為太尉總管為分水巡官三衛學正者至曾祖彥才  
始不仕讀易自娛祖士瞻國初辟雍縣令考臨封某官  
太史生永樂癸巳六月三十日卒于天順戊寅十月初  
四日太安人生永樂壬寅十一月十六日卒于正德丙

寅四月初十日享年八十有六子男二長即工部君以  
庚戌進士累今官次璠早卒女三長適湖廣僉事侯方  
先卒次適儒士張泰泰卒守節不貳次適張某孫男三  
俾簪第皆習舉子業女一曾孫男四女三太史葬以卒  
之明年六月十二日太安人合以卒之年十二月十六  
日墓在佘山自郡城北行二十里銘曰

維周在淞自汴徙兵戈搶攘莫原起都團尉總差可紀  
亦有三衢譽髦士彥翁瞻臨嗣田里中間小試牛刀比

嗇而豐之發太史祥雲麗空萬目視望為霖雨嗟虛擬  
中閨栢舟指心矢緝麻九熊勵孤子艱危植立承先祉  
千載瀧岡渺同軌蛇峯盤盤鳳之尾我營雙丘今合矣  
刻詞貞珉告來祀

楊宜人邵氏墓誌銘

吏部員外郎慈溪楊君銘父配宜人邵氏諱玉字如玉  
其先究之曹縣人曾祖柳洪武中知浙之定海縣因家  
焉祖某父某個儻有英氣以貲雄于鄉嫡母方氏母連

氏宜人幼而明慧聞弟姪輩讀書即能誦之於字畫不甚識而義理多所通解端靜貞淑宗黨皆賢之成化丁未歸楊君為繼室是年君初第進士後歷知崑山高平常熟三縣中丁外艱入為考功主事宜人皆從周旋二十年秉禮服義未嘗以尺寸私亦未嘗增事服飾見者不知為有官者之妻也平居應接每謙抑處下片言之失亦惟恐其有傷焉正德丁卯遘疾腫發咽齒間君為求專醫朱氏者視之朱老人也術且精宜人峻拒曰豈有

婦人而開口向男子乎寧死吾不願其視五月二十二日竟以是疾卒且卒屬君以後事令悉如禮斂勿用首飾未還葬殯勿寄僧舍且經畫其家事訓飭其子女及遺謝諸親戚咸有條緒下至臧獲不遺而尤以不及終事太宜人為恨壻王導侍其父來謁選聞宜人疾將委禽焉亟止之曰兩家皆詩禮族難同小家作柩前拜且太宜人未命其誰敢導入問疾以手握牀幄自蔽與之訣氣垂絕猶手整衣衾至卒不少亂蓋君之自述如此

吾觀楊君早自潔修居官所至有聲蹟謂其本源之地有  
與立焉由今觀之則宜人之為助蓋亦多矣宜人之賢  
尤莫著于垂沒之際然他猶可能也至于病不許醫師  
視其口寧以喪其身而不顧則其所執果有重於生者  
推此以往夫孰能奪之而人豈易及之哉楊君謂宜人  
類君子素問學而涵養深者誠然吾不謂之過也宜人  
以成化戊子十二月二日生二十二年而嫁嫁十二年  
而封為命婦為命婦九年而卒得年僅四十子男四孫

辰孫斯孫龍其一天女五大順許嫁宛平縣丞王朝宗  
子即導小順尚幼其三天孫二世顯世賞則前室子孫  
元出也君以是年十二月二十一日祔孺人於其縣之  
陽嘉山先塋之左屬予為之銘銘曰

家之政始于躬婦也弗宜亦撓厥中有矩有儀匪貞弗  
從以約為豐成楊子之素風者其於此乎宮邪

錢宜人鄒氏墓誌銘

無錫有大族二曰鄒氏錢氏鄒氏當宋中葉由晉陵徙



縣之泰伯鄉自忠公後以仕為諱咸隱于農栢堂桂軒  
林泉三世尤著錢氏自臨安來再遷至磚橋梅堂閱耕  
南丘三世尤著兩家門閥相對世為婚媾南丘與林泉  
契分尤厚宜人於林泉為長女而南丘冢子曰世恩者  
為林泉所奇愛故宜人歸焉時年始十八克自抑慎周  
旋稱謂之間不輕出一語人初以為倣久而後知其賢  
世恩學稍懈則曰無以燕昵累新婦無以少壯妨終身  
游學宮欲與之俱則曰舍舅姑而從夫違鄉井而入市

近澆不可蓋藜羹布服獨居蕭然者數年歲嘗弗登捐  
首飾質粟以食家衆諸姑之嫁輟奩篚以資之未嘗吝  
惜世恩喪南丘領鄉薦擢進士為客部主事屯田員外  
郎都水郎中率禮舉職有聞于時宜人預有助焉世恩  
在都水分司河西務間出行河宜人留官居嚴飭内外  
或決旬不啓鑰推此類可見矣性篤孝林泉翁疾病請  
於世恩歸省之渡淮幾覆而免既至一月而父歿服喪  
盡哀在河西以姑太宜人年七十請歸為壽既而奉以

北來及以子喪歸送之踰千里其在家嘗贊世恩作樓  
以奉母既成日誦佛書其上曰將以為姑壽也正德丁  
卯以林泉忌日設奠于分司哭仆久之遂得疾時世恩  
留汶上比還疾已甚昇入京半月遂不起時十一月十  
八日也宜人每以姑老子仁輔病諸孫幼稚勸世恩乞  
身歸疾革勸之益力遺言斂用嫁時服以養姑弗終為  
恨迹其素行與垂歿之言皆暗合教典有士君子所不  
逮者少嘗讀列女傳小學諸書皆能通其意世恩雅工

詩或吟哦不定曰此未穩也或曰此可矣皆中肯綮公  
事有疑治之必決其明達又如此天順己卯三月十六  
日生比卒得年四十九始以主客三載恩封安人繼進  
宜人子男一即仁輔女五人孫男三人去固去因去罔  
世恩以祖墓軍帳山兆域不能容命仁輔作新塋於某  
鄉以戊辰冬十月甲子葬宜人而自為狀授予俾銘其  
墓石夫宜人之相君也力故君之念之也深予於君為  
同年生辱知且厚義有以釋其哀也乃即狀括而銘之

銘曰

錫山之望鄒與錢兩門角立傳世婚林泉南丘契彌敦  
是生淑女配哲人瑤琴寶瑟聲正溫七七數成斷朱絃  
高情雅韻空遺言紅旌旅襯潞水濱天長地久黯消魂  
我銘為君寫煩冤

太安人陳氏墓誌銘

代作

太安人陳氏今考功主事李君元吉之母故通判太原  
淮安二府諱雄字世傑之配故山西太平縣丞諱中之

女其先實太原人四世祖克柔當元季避亂東徙遂為東昌堂邑人母李氏娠時太平君有異夢既生甚喜曰是必慰人意及長端容止不妄言笑女工精緻過人讀女誠孝經等皆通大意太平君愛之邑大家爭聘皆弗許擇壻得太原君遂以歸之李氏故堂邑鉅族至太原寢微方勵志問學不屑事生事安人脫簪珥躬緝績節省浮費為家人倡數年家遂康從宦太原迎舅姑官舍飲食衣服必親每先意問所欲惟恐弗稱適淮安時姑

老不欲南安人力請曰古人恥獨以孥入官舍姑若留  
新婦當以身養何敢往姑感其意乃行相太原君四十  
年雖燕處無惰容慢語賓客至隨所需俄頃而辦且豐  
約皆中適君或遠出倉卒比行則裝橐已具如夙戒然  
君在淮安思歸顧仕未達以親及安人為念安人曰知  
止不辱古之道也若早歸以全晚節是所以億寧先靈  
而箕帚使與光榮多矣君喜遂乞致仕歸其在官常語  
君以祿有贏無為家計太原君廉能著兩郡卒以全歸

安人蓋有助焉教諸子嚴甚少不率輒痛懲戒甚則加鞭朴考功學既成以第一人薦山東擢進士為翰林庶吉士為刑部主事調吏部才良著稱而安人猶訓督不少懈稍不當其意即不容見跪請罪弗許至有善可贖乃已其教諸女亦然動必依古內則凡勞事必使親之曰逸于家將無以事人也性不喜華飾平居常衣澣濯衣至貴猶不改考功輩奉養或稍豐輒不懌待宗族有恩伯俊喪其偶請于太原取其子璇育之俊卒遺一男三



女璇早卒有遺腹子皆請而鞠之及長為畢其婚嫁無失所者鄉之稱母德者莫先焉以正統丁巳正月初九日生弘治乙丑受封命正德戊辰秋七月七日卒享年七十有二子男二長元亨讀書尚禮以輸粟賑貸有章服次即考功女三長繼姜適兵部主事闕里孔公才次繼任適陰陽訓術梁綬次繼佳適義官張克審孫男三繼東秀東蕃東女二長淑順許嫁祥符知縣王臣子邦禎次淑靜元亨等將以某年某月日祔安人于李胡莊

太原君墓次奉檢討穆君伯潛狀來乞銘元吉在翰林  
予以文知之穆君之言信而可徵也乃為銘曰

李祖景讓德以母崇堂邑之賢實相太原以成考功令  
德令儀光于二宗李胡之阡太原所宮歸以永寧德音  
無窮兮

封宜人劉氏墓誌銘

王君良佐奉詔使嶺南還次鄂渚聞其母宜人喪匍匐  
造朝致使事退衰服詣予持工部主事向君文璽狀泣

拜乞葬銘方是時君父栗齋長史侍德府居山東宜人卒時母子夫婦不相見故良佐不勝哀予時方病見其貌纍然亦不能辭也按狀宜人諱妙靜小字慶雲姓劉氏世家瀏陽系出漢長沙定王後宜人大父榮以武立功國初為錦衣衛百戶父顯嗣校尉再世宿衛生宜人於京師王氏在元為夷陵宦族入國朝衣冠不墜栗齋之少也侍其父靜菴君需次吏部與顯比鄰又皆楚人相好也故宜人歸栗齋時年始十七德充于容動遵禮

範女工外能兼通內則列女傳諸書栗齋刻志問學或  
夜分不寐宜人篝燈相對寒暑同之未始有倦色栗齋  
學有聲登成化丁酉鄉薦為中書舍人為雍府審理正  
以至于今官時稱善職中閨之相居多焉靜菴倅廣州  
地多炎瘴宜人時服食節起居越六年無病癘者自廣  
還姑雷與靜菴相繼歿栗齋方病不勝喪宜人兼總內  
外治殮殯視醫藥綜理周悉存歿賴之雍府之喪栗齋  
當詣闕留宜人于荆臨別數語皆居官要理及家門久

遠計聞者悚然舟次得暑疾抵家而病遂以不起時正  
德丁卯八月朔日也距其生景泰癸酉得年五十有五  
遺命殮用禮衣去金珠華飾治喪用家禮不作佛事其  
明達有如此平生慈愛雖一物不忍傷栗齋居京師置  
二側室宜人自荆來視之如女二人者亦以母事之惟  
教諸子嚴甚待劉氏親屬自吉凶禮遺外不私一錢斯  
皆人所難也栗齋中書滿考封孺人為長史進今封子  
男十人良臣醫學典科次即良佐舉乙丑進士任行人

次良翰生員良材義官次良翼良貴良謨良棐良策良  
榮良策出側室陳氏良榮出張氏良棐先天存者皆業  
儒女四長適義官常綬次適千戶龍某子希顏餘在室  
孫男六人女五人曾孫男一人女五人良佐始學于予  
故予知其賢不謂其兄弟子孫之盛如此宜人之德於  
是乎有徵而王氏之後將益大已是宜銘銘曰

長沙之後儷于太原克相其良用舉厥官樛木螽斯在  
古稱賢我見其人其獲已蕃尚有來者視我銘篇

封昭勇將軍騰驤右衛都指揮僉事陳公墓誌

銘

燕山右衛副千戶陳公以子紀任騰驤右衛都指揮僉  
事得封如其官階昭勇將軍年八十考終于正寢紀率  
其弟經等以明年己巳二月十日葬公于都城南白紙  
坊奉監察御史高君子洲狀請銘其墓石按陳氏通州  
人公曾祖大公以上皆不仕祖得以靖難功始為燕山  
左衛百戶考興嗣之公少而挺特雖藉有世祿恒思以

功業見不知者或靳侮之會鄧茂七反閩中寧陽侯陳公帥師征之以公備行列公笑曰此非吾立事時邪既至奮勇先登斬首虜以還錄功進副千戶於是靳者乃服而公初不自得也久之謝去以其職授紀家居治生事教諸子以讀書後紀官日顯家日鉅經以文學稱李約領戊午順天鄉薦公之名隱然動京師雖閭閻女婦語及公無不知者遂陟崇封都顯秩寵祿方新而公老厭世矣公性孝友尤篤於交誼妣郭孺人蚤卒繼母高



賢明善理家公事之如事郭氏凡有教無弗從家用是起弟泰欲異居泣諭弗可乃聽泰後廢產每周之故人王恕死貧甚公葬之後圃柳紉經庭畧不為意家人聞哭聲惡之則曰此王君之有妻有子也何惡焉他行事多類此推是心雖季武子之處杜氏殆無以過其享有祿壽而子姓蟬聯夫豈曰偶然哉公諱亨字曰伯吉以宣德己酉某月某日生正德戊辰十二月二十五日卒配張氏先卒贈恭人子男四長即紀以公蔭從威寧伯

王公出塞獲功累今官總四衛營次經次綸義官次約  
女一適錦衣衛百戶阮仁孫男九榛楠桐梓梗檟松梅  
槐女八長適威寧孫紹餘未行經舊從予游因以識其  
昆季而聞公之行事子洲之狀又信可徵也乃為銘銘  
曰

孰承而弘孰傳以興而孰永以齡惟天之明惟德之馨  
惟後來是繩吾以徵吾銘

尚德處士黃君墓誌銘

徽之歙縣潭渡有黃資仁氏其諱曰資其別號曰尚德  
其先出江夏孝子後居祁門左田有諱光者始遷歙之  
黃屯光子芮唐貞元中孝子自黃屯再遷潭渡至今家  
焉元季有諱仕章者作堂奉親曰存誠君高祖也仕章  
生彥康彥康生克成克成生有中皆不仕皆以善行稱  
于鄉君有中子也少而端雅弱冠頎然出其流輩剛而  
有制柔而能立意度豁如而孝友天至有中得閔疾醫  
藥弗効君籲天祈代親以口吸而通之客游四方得輕

暖珍異必以寄至玄宮壽藏凡可以為親地者無弗致其力焉母早卒事繼母汪蔣皆如其母汪及二弟義俊嘗病疫君躬視湯藥晝夜不少解時疫熾且傳或勸宜少避君揮之去曰吾寧棄骨肉而苟生乎卒無恙存誠堂火君感然曰當吾世而有是吾責也亟新之且揭其舊榜以昭先志祖塋無久近悉加封植為買田築室以守聚家之子姓延名師以教之幼弟雄智孤姪洪皆賴以成立凡所規畫皆以為家門久遠計而尤急于利人

見貧不能存若喪不能舉者助之貸而不能償者或舉以予之舊館人上海徐經業中替以屋質於人君贖還之且經紀其家事經家復振感君入骨髓而君無德色也人有犯不較曰小忿不懲媒大禍寸土是競傾其家時以為名言平生非公事不入官府晚築室黃山梅溪之陽環植竹樹往來吟眺於其間有浮雲富貴之意子倫游邑庠常責以遠到每秋試不利輒曰汝學實未至實至而名隨之矣倫游太學有聲君聞而喜曰吾兒學

果進乎正德庚午倫試順天有日而計至實六月十有  
七日也距生時宣德辛亥十月初六日享年八十配方  
氏同邑名家女佐君起家先若干年卒子男二長某先  
卒次即倫女三孫崧吳文奎太學生汪璽其壻也孫男  
五鑑錠鈔錠鋈錠予嘗見之佳子弟也女二長適吳某  
次尚幼倫既聞計即日治裝南歸以刑部員外郎唐君  
需之狀走書松上乞予銘將以某年某月之某日葬君  
於城東清石磯之墓唐君謂公才足以起家德足以善

俗在今誠不可多得倫從予久又嘗聞君家世之詳蓋  
純孝一脉累世相承所以根于心而發之事者固有自  
來也詩曰孝子不匱永錫爾類其君家之謂乎是宜銘  
銘曰

潭湖之宗出黃屯上溯江夏雲之雲惟孝與慈世彌敦  
在昔多有今資仁前承後啓煌復焜我識其子亦見孫  
甘泉有源蘭有根後來觀者徵予文清石弗泐公永存

友竹處士胡君墓誌銘

處士諱清字景濂姓胡氏別號友竹人因以稱之其先  
家平湖元季兵亂自戈溪徙華亭界涇南遂為華亭人  
五世祖觀一生德明德明生愷愷生昱號存仁有三子  
君其仲也觀一以下皆不仕皆敦樸好善稱于其鄉君  
生而倜儻與兄澄友松弟清友梅皆有幹蠱才泖東王  
竹軒與存仁善見君而器之許妻以女且館于其家奩  
篋資裝甚厚王氏卒君一無所取飄然來歸人以是知  
君胸次不凡矣既歸與兄弟客江湖間居積日富友松



因別治產而以祖業推君與友梅君聞而起曰兄能若是弟何獨不然即盡推其季買地界涇之北而築室焉縉紳高之名其所居堂曰雍睦紀實也晚年康健日以教子孫務耕讀為事暇則招賓客觴豆嘯咏以樂太平人皆悅而親之正德辛未年七十七矣以八月一日考終于正寢宣德乙卯四月二十九日其生辰也初配王氏子一人曰景推長鄉賦鄉為倚平先五年卒繼金氏有一女適省祭官嘉興彭誥孫男一邦直太學生女六

以卒之歲十二月八日葬界涇祖塋禮也予少與友松之子以祥游因獲識君及締姻于嚴以德氏嚴又胡出也故邦直往來予家益親將葬君以銘誌為請誼不得辭也銘曰

室有羸不以為吾利也家有承惟吾弟之遺也匪吾之能繫兄志也界涇洋洋三塚相望不力于躬而閱于牆來視此銘章

東江家藏集卷三十